

共同經課-1 耶利米書三十一章三十一節～三十四節

31 耶和華講，看 ah，日子 beh 到，我 beh kap 以色列家，猶大家，立新 ê 約；32 m 是照我 kap in ê 列祖所立 ê 約，tī 我牽 in ê 手，chhoā in 出埃及地 ê 時所立 ê；我雖 bóng 做 in ê 丈夫，in 猶原背我 ê 約；這是耶和華講 ê。33 耶和華講，hiah-ê 日了後，我 kap 以色列家所 beh 立 ê 約是 chit-ê；就是我 beh 用我 ê 律法 hē tī in ê 心內，刻 tī in ê 心；我 beh 做 in ê 上帝，in beh 做我 ê 百姓。34 In 無 koh tak 人教示 in ê 厝邊，kap in tak 人 ê 兄弟，講，Lín tiòh bat 耶和華；因為 in tùi 大到細，lóng beh bat 我；因為我 beh 赦免 in ê 罪過，無 koh 記得 in ê 罪；這是耶和華講 ê。

共同經課-2 詩篇五十一篇一節～十二節

1 大衛 kap Poát-sī-pa 同房以後，先知 Ná-tan 來見伊，伊做 chit-ê 詩；交 hō 樂官。1) 上帝 ah，照你 ê 慈愛憐憫我；照你豐盛 ê 慈悲擦消我 ê 過失；2 將我 ê 罪惡一盡洗除，亦洗清我，到無罪。3 因為我家已知我 ê 過失；我 ê 罪常常 tī 我 ê 面前。4 我所犯 tiòh-ê，就是得罪你 nā-tiāⁿ，Tī 你 ê 目矙前行 chit 號 pháiⁿ；致到你講話 ê 時，顯明做義；判斷 ê 時，顯明公道。5 我是 tī 罪惡中生 ê，Tī 罪 ê 中間，我 ê 老母懷孕我。6 你所 ài-ê 是心內誠實；Tī 我 ê 腹內，你 beh hō 我得 tiòh 智慧。7 求你用牛漆草洗我，我就清氣；求你洗我，我就比雪 khah 白。8 求你 hō 我得 tiòh 聽見歡喜快樂 ê 聲；Hō 你所 at 折 ê 骨 thang 歡喜。9 求你掩你 ê 面，無看我 ê 罪，擦消我一切 ê 罪惡。10 上帝 ah，求你 kā 我創造清氣 ê 心，Hō 我 ê 內面有換新正直 ê 神。11 M-thang 趕我，hō 我離開你 ê 面；M-thang tùi 我收回你聖 ê 神。12 求你 hō 我猶原得 tiòh 你救恩 ê 快樂；賞賜我有自由 ê 神，來扶持我。

共同經課-3 希伯來書五章五節～十節

5 親像 án-ni，基督亦 m 是家已尊做祭司頭，就是 hit-ê 對伊講，你就是我 ê Kiáⁿ，我今 á 日生 lín ê。6 Tī 別位亦講，你永遠做祭司，照 Bék-ki-sé-tek ê 班列。7 基督 tī 伊 tiàm 肉體 ê 日，用出力喉叫，koh 流目屎，獻祈禱懇求 hō hit-ê 話救伊出死 ê，koh 因為伊 ê 敬虔得 tiòh 聽見，8 雖然做 Kiáⁿ，亦 tùi 所受 chiah-ê 苦難來學順服；9 已經成做完全，就做凡若順服伊 ê 人永遠 chin-求 ê 根源；10 hō 上帝 chheng 伊做祭司頭，照 Bék-ki-sé-teke5 班列。

共同經課-4 約翰福音十二章二十節～三十三節

20 當節期上來敬拜 ê，中間有 kúi-nā 個希利尼人；21 in 就近加利利 ê 伯賽大人腓力，求伊講，先生 ah，阮 ài 見耶穌。22 腓力來 kā 安得烈講；安得烈 kap 腓力來 kā 耶穌講。23 耶穌應講，人子得 tiòh 榮光 ê 時到 lah。24 我實實 kā lín 講，一粒麥無落 tī 地裡來死，就猶原一粒 nā-tiāⁿ；死，就結實 choē-choē。25 疼家已 ê 性命 ê，就喪失伊；怨恨家已 ê 性命 tī chit 世間 ê，的確保伊到永活。26 人若服事我，就 tiòh tè 我；我所 tī-teh ê 所在，服事我 ê 人亦 beh tī hia；人若服事我，我 ê 父 beh 對重伊。27 Taⁿ 我 ê 心大擎腹；beh 怎樣講？父 ah，救我出 chit-ê 時。總是我為 tiòh chit-ê，chiah 到 tī chit 時。28 父 ah，願你榮顯你 ê 名。就 tùi 天有聲講，我已經榮顯，beh koh 再榮顯伊。29 Khiā tī 邊 á ê 眾人聽見就講，是雷 tân；有人講，是天使 kā 伊講話。30 耶穌應講，Chit-ê 聲來，m 是為 tiòh 我，就是為 tiòh lín。31 Tī chit-tiáp chit 世間受審判；tī chit-tiáp chit 世間 ê 人君 beh 受趕逐。32 我若受舉起離開地，就 beh 引 chhoā 眾人就近我。33 伊講 chit-ê 話，是指伊 beh 甚麼款來死。